

VAN DIE REDAKTEUR



DIE AFRIKAANSE TAALFEESJAAR EN DIE SAKELEWE

Engels! Engels!
Alles Engels!
Engels wat jij siet en hoor;

So het F.W. Reitz aan die einde van die vorige eeu geskryf oor die posisie van Afrikaans. Afrikaans het nie oornag ontstaan nie, maar kan wel spog met 'n doopdatum: 14 Augustus 1875 — 'n honderd jaar gelede.

Oor die afgelope honderd jaar het Afrikaans ontwikkel tot 'n erkende lewenskragtige en selfstandige taal. As taal het dit bewys gelever dat dit beskik oor 'n besondere uitdrukkingsvermoë, 'n raak segswyse en 'n vermoë tot naamgewing. En dit geld al die terreine van die Suid-Afrikaanse samelewing, ook die sakelewe. Daar is al sowat 26 000 boeke in Afrikaans gepubliseer. Van die Afrikaanse skrywers het al wêreldroem ingeoes. Oor dié honderd jaar is 'n lewenskragtige letterkunde opgebou. Daar bestaan Afrikaanse terme vir talle beroepsfere.

As 'n mens egter na die briewekolomme in die dag- en weekblaaie kyk, kan jy nie anders as om te besluit dat daar, veral in die sakelewe, 'n algemene traagheid bestaan om Afrikaans te besig nie, ook by dié sakemanne wat van huis uit Afrikaanssprekend is. As kommunikasiemiddel het Afrikaans reeds die toets deurstaan! Wat sou dan die rede wees vir die traagheid?

In sy rubriek "Die Nuwe Politiek" berig Pollux in *Rapport* van 13 April 1975 dat prof. Bozzoli, rektor van Wits, by geleentheid twee derdes van sy toespraak in mooi Afrikaans gelever het. Hoe is dit moontlik? *Hy doen moeite*, sê Pollux.

Met 'n bietjie moeite kan selfs 'n Engelssprekende die moeilike Afrikaanse "keelskraap-g" baasraak. Vir die baie Engelssprekende sakemanne en bestuurders wat wel die moeite doen om ook Afrikaans sy regmatige plek te gun deur nie slegs die gebruik van Afrikaans in hulle organisasies toe te laat en aan te moedig nie, maar dit self te praat, wil ons sê: bravo!

Aan ons Afrikaanssprekende sakemanne en bestuurders wil ons sê: U het baie om op trots te wees! As Afrikaans, om een of ander rede, op die tweede rang geplaas word, sal ons in Suid-Afrika binnekort nie eens meer "koeie dak" vir "goeie dag" by ons Engelssprekende landgenote hoor nie. En dan kan u as Afrikaanssprekende maar sê: "Koebaai, my moedertaal!" (Pollux).

ERKENNING

Daar word met groot waardering erkenning verleen aan die toekenning ten bedrae van R700,00 wat vir die publikasie van hierdie tydskrif ontvang is van die Departement van Nasionale Opvoeding.